

武宣縣志卷十一

紀人 目錄

名宦傳

鄉賢傳

節烈傳

武宣縣志卷十一

紀人 目錄

一

梧州商業日報承印

武宣縣志卷十一 紀人

列傳名宦

目錄

劉 勳	李 頌	曹利用	梁 頽	馮 源
于 海	麥宗祥	陳 昱	顧興祖	山 雲
張 遜	張 昶	莊 能	吳 赴	戴 璽
葉 喬	方大綬	吳元士	蒙 賢	尹 璿
龍登俊	劉允升	申 泐	祝應龍	車君乘
王錫九	翁年倫	盧伯蕃	孫紹伯	蕭池山
茅本蕙	福 格	謝紹江	况逢春	何壽增
熊繼軒	宗式坊	陳品全	陳鴻謨	尹佐湯
盧建堃	唐朝繩			

武宣縣志紀人

列傳名宦

南北朝宋

劉勔字伯猷彭城上里人仕宋爲龍驤將軍先是遣陳檀不克乃除勔西江督護鬱林太守勔既至率軍進討隨宜翦定大致名馬并獻珊瑚連理樹上甚悅後拜廣州刺史元徽中桂林王休範作亂勔與戰死之事平贈司空

唐

李頌知武仙政簡刑清撫士有方民懷其德邑人祀之又入名宦

宋

曹利用寧晉人景德中宜州澄海軍校陳政殺主將劉永規陷柳州城圍象州嶺南騷動上以利用爲廣南安撫使張煦爲廣南西路安撫使張繼能副之與賊持於武宣之李練賊蒙衣甲順水執標牌以進鋒鏑不能入利用持大刀濶斧擊破之

武宣縣志卷十一

紀人 名宦傳

三

梧州商業日報承印

斬陳進嶺南遂平（參張繼能傳）

梁顥高要人祥符中任武宣主簿平易近民多德之轉封川司戶參軍祀名宦
馮源任魯郡從政郎建炎間署武宣縣事愛民如子民懷其德

明

于海洪武中爲柳州衛指揮僉事守大藤峽岢蠻聚衆攻劫海率兵奮擊賊潰散搜勦殆蓋一方遂安

麥宗祥永樂中知武宣持身端謹寬以恤民除惡護良邑人尸祝祀名宦
陳昱保昌人永樂間知武宣以德化民不用刑罰撫輯猺蠻最有方略歷陞兵部主事

顧興祖字世延嗣鎮遠侯宣宗時廣西諸賊叛出梧州界興祖時佩平蠻將軍印率兵自天門入平南大軍駐大藤峽江口殲羅祿諸山賊駕舟入峽抵潯州水陸夾攻武宣諸賊獲其魁韋保蓬傾巢舉落無噍類請增置桂平平南十縣土司副巡

檢各一員凡五十人舉土人陳扶神等用之

山公諱雲封懷遠伯事實俱載明史宣宗二年本傳言公鎮廣西平猺賊後乃築四城九堡傳舍九十餘區以鎮要害攷我邑舊縣志云宣德三年二月虎入城冬十月猺賊仍入寇定議遷縣四年大建城廓置廨六年懷遠伯山公始移茲土然則明史言公所築四城者武居其一矣邑人立公祠於城東門內武廟左謂其平猺賊遷縣治有功也今祀祠久廢而故址猶存嗚呼時代變遷公之功德常昭於千古一祠何關輕重耶附明史併公廟碑於后

明史宣德二年七月命都督僉事山雲鎮廣西 傳云柳慶蠻韋萬黃等糾合猺獠糾掠臨桂諸縣鎮遠侯顧興祖坐逮命雲佩征蠻將軍印充總兵官率官軍討之賊退堡山巔壘石於籐俟官軍至輒斷籐下之莫敢近雲後束火牛羊角以金鼓驅向賊賊亟斷籐下木石且盡衆譟而登斬首萬餘級賊降雲乃築四城九堡傳舍九千餘區以鎮要害初土官饋獻帥率受之然卒爲所持雲聞府吏鄭守剛

直召問曰饋可受乎守曰潔衣被體一污不可復湔將軍新潔衣也雲曰彼且疑奈何守曰黷貨法當死將軍不畏法乃畏土夷耶雲曰善盡却之由是土酋皆服明陳演征蠻將軍山公廟碑 僉右軍都督府事山公雲世家徐州留城乃考青洪武間征伐有功官至都督府簽事既終公克紹前烈勞不怠宣德丁未秋欽奉宣宗皇帝敕命授以征蠻將軍印守鎮廣西下車之日正己率人禮文職之賢嘉武官之勇衣服不尙華采飲食不厭菲薄嘗遣將士出幹軍務令左右密隨訪察之恐爲有司擾由是承使者秋毫不犯郡縣肅然又嘗號令部伍有科士卒一錢者處重罪營堡之間各知守法軍民均受福矣每出征伐預召諸將指受分擊之處畫以奇策沈謀獨斷之出於燭照龜卜而不惑連歲親征雖深溪險嶂所臨無不克服自昔征蠻之將未有盛於公也惜乎經營未倦壽考云終時正統三年歲次戊午孟冬十月九日也思恩大守岑君思慕不已乃伐木鳩工建廟於城之北以祀之正統十年七月十五日落成棲公之神翌日奠獻如式來徵碑於余弗辭

敷暢其實而銘曰有明聖人萬邦之君統馭六合海宇同春惟此炎荒猺獞莫馴
攻鬪兇暴流毒於民一旦命公來靖其兇公秉丹衷竭職戢忠親率三軍如虎如
熊抵穴臨巢電掃雷轟鬼斷神謀餘孽罔留伸民之冤復民之讐民婦子女還歸
父母鰥寡孤獨咸得其所兇惡既平良善以甯婦織夫耕胥慶其生十有一載公
其永逝功德在人久而弗替作廟祀公答公之功公櫬歸徐公神在空勿謂不至
如水在地念之在斯敬之在是嗚呼惟公正直生爲良將死膺廟食願祐生民願
扶社稷於斯萬年永歆常式

張遜宣德間知武宣省刑寬賦時邑城新建百堵俱興民感其德樂爲趨事祀名宦
張昶天順間知武宣慈愛馭下政簡刑清民皆化之祀名宦
莊能浙江人宏治間任武宣訓導文學淵博士人多所造就
吳赴字由之高要人正德間知武宣愷悌慈祥不事赫異而百廢俱興歷陞大理寺
卿士民懷之祀名宦

戴璽湖廣人嘉靖間知武宣愛民如子作興學校士民德之

葉喬嘉靖間知武宣有惠政祀名宦

方大綬廣東惠州人嘉靖間任武宣教諭嚴正自持取與不苟課業維勤多士藉以
裁成後陞潯州教授所著有見山詩集

吳元士崇陽人嘉靖間知武宣政平訟簡鰥寡皆得其所邑人歌思之

蒙賢萬歷間知武宣著有治績

尹璿字和石東莞人天啟間知武宣除盜安民恩威並著祀名宦

龍登俊桂林舉人天啟二年任武宣教諭模範端楷造就多士咸藉陶成門下士掇
巍科者甚多陞湖廣知縣

劉允升吉水人崇禎初知武宣潔己愛民捐修文廟創建尊經閣士民德之

申泚字季膺祁陽人知荔浦縣崇禎十五年署武宣縣事惠民興學鼎建辛巽二門
士風賴以丕振

祝應龍武岡人明末署武宣縣事時官兵往來騷擾應龍護民如子多所保全甫三月以讒去士民攀留不得尋以疾卒邑人作詩哀之曰泣宣二月仰循良 一旦青蠅甚可傷 幾把慈航淪苦海 曾將捍牧詠甘棠 瘡痍自後誰安撫 奸宄於今漫肆狂 治亂推公爲第一 民思千載尙遑遑

清

車君乘浙江德清人順治六年知武宣時草寇未平縣治殘毀君乘涖甫兩月率弟君稷捍禦力盡城陷被執罵賊不屈同死之妾陸氏幼子二僮僕數俱被難雍正六年旌表

王錫九栢鄉人康熙九年由進士知武宣建縣遷學造就人才理訟用木皂隸勾攝鄉里不擾陞臺灣同知祀名宦

翁年倫字序五餘姚人康熙二十年知武宣時值賊蹂躪後民多流亡倫下車招集給以耕具政事以次修舉調西林縣

武宣縣志卷十一

紀人 名宦傳

六

梧州商業日報承印

盧伯蕃連州人雍正十二年由進士任武宣縣潔己愛民有惠政邑人謳思

孫紹伯貴陽人乾隆乙酉知武宣縣能察民情剔奸慝明聽斷釋錮獄去後民思之蕭池山東日照人嘉慶丙寅攝武宣縣事潔己奉公培養士類訟不留滯盜賊斂跡居宦數月民甚德之

茅本蕙咸豐丙辰知武宣爲政尙嚴反側多害其能何晚者艇賊黨也既而降於官軍使管水師其伍何維杜洪皆忌之艇賊梁踔友李文茂與晚不平使彪等誣晚吞蝕軍饗殺於江中遂襲城執本蕙斃之右江道黃輔同執不食而死

福格某旗人潯州協副將駐師武宣咸豐丙辰三月二十二日土匪韋祖芬結艇賊昏夜撲城武宣再陷福格巷戰手刃數賊而死同時守備朱錦華把總李桂芳撫標右營守備吳錦蘭皆遇害

謝紹江直隸豐寧人咸豐戊午攝武宣縣事石達開譚提沅等率黨三四千人由桂平新墟趨武宣西下里各處紹江募勇集團連勝之事平招撫流亡不遺餘力以

勞力卒

況逢春字藹如江西上高人同治己巳由進士官武宣知縣以廉稱邑中胥吏多藉丁糧加規費紳民積苦之逢春詳定糧石折銀四兩地丁若干兩並裁串票小費積弊頓除由是教民興學親爲課士且次第修復文廟義學頗知爲政之本云何壽增字省菴廣東順德人同治戊辰進士壬申知武宣性廉靜愛士恤民政暇則親校課藝裁成寒畯邑有土豪占人田業壽增斷令充作公田而以邑紳胡祥宸招佃輸租爲大比年士人鄉舉費膠庠中食德爲多修葺城衙署不役一夫不斂一錢百廢俱舉充癸酉鄉試同考官以勞病回任而卒身後蕭條邑民哀之熊繼軒字星臣安徽六安人光緒壬午由進士知武宣縣廉明果決蒞任八月剖決如流案無留牘民有爭訟者折服則釋去行則目送出門而後已胥吏斂手不敢因緣爲奸其恤民類如此捐俸建仙城書院以分校鄉試去任士民惜之宗式坊號樵林直隸人丙戌進士壬辰知武宣性情剛正勤訪民情不可干以私縣

有控地界案歷縣府省控十年不決幾釀大禍坊獨驗其印模與康雍時不符斥之案遂服結惟拂府官意竟調隆安不久省憲廉知其情仍得回任凡有赴訴莫不以一批一訊盡得其情至今猶有神明之號云

陳品全字敦甫四川人由進士補武宣學問淵博才識明敏聽訟口訊筆判一時俱就人不敢欺尤喜栽培士類議興修學校而經費不足有公產田附郭二十餘畝幾難問主人翁矣公到任後查明追出提歲入租項爲學校常年經費學校得成立者皆其主持之力迄今士林利賴焉

陳鴻謨號文仙湖北黃安人舉人揀選署武宣下車卽以興利除弊與民更始爲任時有賊魁楊三陳狂六等嘯聚山谷常出劫掠黃茅蓮塘二塘諸鄉公乃整頓鄉團詣郡親領槍彈按鄉給領又捐廉募鄉兵數十人扼要遊擊不數月盜戢民安其培養士類尤爲熱心開自治局倡辦縣學堂暨各鄉初等小學堂皆步行親行演說士風爲之一變惜不久卽補羅城去邑人挽留不得乃立去思碑於東門外

官亭

尹佐湯臨桂舉人同治間任武宣訓導立品端方一言一行必出於正課士最嚴其配貌寢而眇以才德相配相敬如賓士之遊其門者莫不嘆服不敢有輕薄之行也

盧建堃河池廩貢同治光緒間兩任武宣教諭寬柔以教度量汪洋而居官廉潔人不敢干以私前後在武十餘年至今猶令人思

唐朝繩字繫生梧州藤縣人清同知法政畢業民國元年卸雲南軍警要差回籍仲秋奉委知武宣縣事性剛質志潔而行方禮民親士相與開誠布公處事折衷輿論執行悉本勤誠肫肫然以策進共和爲己任躬歷各區清鄉計誅多匪而不擾民創辦中學校及女學校慘淡經營無難色嚴禁烟賭力任勞怨無瞻徇縣志久經殘闕提議籌款重修且捐廉資助聽訟一秉大公衙役未嘗苛擾猶爲不可多得二年季夏請願辭職民不忍舍軍紳學商各界聯電乞留越三年季春奉令咨

送入都考驗在任二十閱月政理風清民懷其德卸事之日餞送塞途

武宣縣志 紀人

列傳鄉賢

目錄

宋

謝洪 謝澤 粟大用

明

梁高 李重 梁任隆 李一唯

清

陳明廉	陳世佩	劉孟三	黃炳星	梁德彰
陳先謀	張任清	黃哀	張夢驥	黎觀光
李元襄	劉季三	王作新	陳朝宗	覃許嘉
梁國標	覃肇猷	黃若桂	陳巽申	陳勝修

張昭然	胡祥宸	陳步高	刁經裕	羅敏德
覃老德	廖大翼	覃天佑	武振貞	韋敬端
黃檢眞	覃貴福	覃松華	趙之楨	王毓元
郭元鼎	周作翰	巫發麟	羅國揚	李維鋆
覃元吉	黎肇基	劉德三	劉炳禮	劉濟和
廖盛泰	廖午養	陳文潔	張鳳翔	覃憲典
劉炳宇	翁盛伯	朱達華	周廣康	陳大燦
陳宗福	覃發材	梁德齡	劉培祿	黃煥章
陳夢昌	龐賡辛	劉志仁	劉日昌	李錦開
黃肇熙	黃運樞	劉永華	李懋材	

列傳

宋

謝洪字宋勳謝澤字宋霖東鄉波豆人兄弟博學能文同舉進士時號謝家二鳳宣和間洪初任南海尉改知賀州澤任昭州歷客館使喜交勁節之士解組歸凡中朝士大夫遷謫此者無不館於其家嘗從張正言庭堅學文王右丞安中履道尚書孫覲仲益學詩家藏王右丞孫尚書墨跡甚多後營謝家園於象城中闢扶疏堂寒光亭題詠滿壁風雅冠時（扶疏堂竹木深邃王安中南征寓之寒光亭孫覲有詩）祀鄉賢（參輿地紀勝粵西文載象州志舊志）

謹按二謝象州志作象之安仁鄉人舊志作東鄉波豆人象志云澤知南平州與此稍不同未知孰是大都象與武宣人不能確指其在彼在此耳邑人陳仁有雙髻山懷二謝詩雙髻實在今武宣東鄉里則其爲武宣人無疑又宋史有四方館使客省使無容館客館使而通志云歷官容館孫志作容館使魏志縣志作客館

使疑有闕誤

粟大用北鄉人幼穎敏七歲能詩九歲善屬文博通經史宋祥符中以神童入見眞宗出一對曰貴地貴人生貴子卽應聲曰明天明日照明君帝大奇之賜登仕郎並袍笏陞參知政事調守南雄以大守致仕歸鄉人立祠祀之今北上里尙有粟家祖祠墓

明

梁高字俯之早歲失怙性敏異宏治乙卯舉人授廣東臨高知縣清廉有才當道考爲十邑賢令之首後隱居林臬祀鄉賢

李重□賴里思律村人任雲南道監察御史以正直著有泉名御史泉

梁任隆歲貢博學能文纂修縣志 按府縣志任隆皆作清朝人而校舊縣志者則云明人檢明至今選舉皆無其人今姑附此

李一唯西鄉人天啟丁卯科舉人任四川遂寧知縣循良有聲遇權勢讐忌被謗尋

遭亂未歸

清

陳明廉字潔所台村人爲人義勇剛明有謀畧訓子弟有法度明末盜賊蜂起有土匪猖獗霸據一方奪人田土婦女邑令莫能制避逃境外廉乃糾合溫黎二姓掩襲殲其渠魁反其所侵掠而一無私焉大府遂署縣事鄉人感公之德而謚之曰安其子世佩號西臺附學生孫九人先喆先謀先睿先恭先彝先美皆歲貢出仕先從拔貢先叙先鼎廩貢授職曾孫三十三人入庠者十一食廩膳者七舉孝廉者二授編修主事者各一

陳世佩號西臺生平好義有節慷慨康熙甲寅吳三桂之亂賊役煩重有田者執契畀人莫之敢承獨竭家貲代徭賦有廖姓世以豪患暴邑中世佩密聞於當事以計擒其豪官杖殺之遂爲邑人除大憝歲饑空困倉減糶以便民食又置祭田千石聚族姻子弟之不能從師者束脩飲食皆取給焉卒年七十九 孫仁字元若號體齋

登雍正癸丑進士授翰林院編修學行醇篤經術淵深由詞垣改御史任湖南儲糧道調四川建昌上南道所至有政聲告病歸里二十餘年家無長物杜門掃迹人罕見其面先是與臨桂陳文恭公宏謀友善以道義相切劘其贈宏謀句云前輩典型有公在大臣風節是吾師可想見其爲人矣所著奏稿詩文藏於家同時黃永年之言曰乾隆初天子慨然遠覽前世直言忠讜之臣嘗臨軒屢歎用翰林六卿之屬凡七八十人以次入御史臺於時臺中各蠶動言事有奮死不顧利害以糾劾爲奸利有力之大臣天子赫然震怒下其事誅不法者風采振動矣獨嘗與一二當國老成私切論以謂主聖臣直上一舉能使御史臺風動如此御史人未必盡賢言未必盡公與是要其敢言之氣不可不愛護而長養之也風動之愛護之長養之終用之直臣其有興乎當此時陳君體齊自翰林院編修擢入臺暨今六年其書凡國是及四方水旱督撫大吏賢否民生疾苦往往能爲上昌言無隱體齋凝然端直嘗慕古司馬文正陳瑩中鄒志完之爲人其氣可尙也劉方藹曰體齋岳岳有氣岸胸懷豁如

泊榮嗜義遇事侃侃敢直言不計利害於古人不敢苟作作必凝思慮釀清虛懇懇欸欸以拒爲迎如驟馬者驅策盤旋之盛其怒而一發則奔逸倍捷如行水者決其勢而梗之激益悍瀉益駛張湄曰體齋近體風骨粹美旨味盎溢每以蛟騰鯨跋之勢蓄縮於數十字中故立言彌約結嚮愈迻蓋原本少陵而時出於大歷諸公其登覽之作既極涵萬象至於廟堂賡颺與夫尋常贈答亦莫不指事殷勤寄意深篤見藹然忠厚之風焉其當日見重學士公卿如此惜奏議多不傳其論述著有補拙齋詩文若干卷旭字東升性敏博學與兄仁同登雍正癸丑授工部屯田司主事

劉孟三號伯壘東鄉蓮塘堡人性嚴正有遠謀崇文尙武道光三十年由武生率壯勇殲滅巨匪陳阿貴咸豐元年七月破洪軍於雙髻卡髮捻奪卡走潯追殺數十里未幾奉檄上桂林轉戰金陵記功保花翎都司二年本省匪亂憫懷桑梓辭職回籍與父老故交築寨於鄉之馬嶺三年至五年胡阿金張金德等率賊數千不敢犯寨嗣是鄉人倚重七年貴縣黃阿相統二千餘人到鄉攻下交河村遂釀成八月土客

械鬪孟三宣慰大義不及二年咸相安集迄今鄉人無軫域猶稱其遺澤焉卒年七十二以侄志仁貴清貤封武功將軍生子八長炳文把總次炳奇武生炳輝武生保都司炳良千總炳亮附生保藩經歷炳宣武生炳寰增生炳宇武生清之末葉管帶防營迨民國二年統領廣西陸軍第八軍獎上校加少將銜孫培嶽恩貢培歲增生培嶽日本東斌陸軍學校畢業管帶廣東警衛軍第七十三營曾孫德鏞德岐附生一法政一警察畢業沿兩朝間武功文德同萃一門懿歟盛矣

黃炳星號拱辰邑增生性純謹嗜誦讀道咸間地方多事奔走流離手不釋卷進庠後設雲峯家塾以造就人材爲目的朋來日衆循循善誘務期領悟至批評文字則纖悉無遺終恐人有未知或知而未盡歷二十七年無少懈故遊庠者多出其門課除援古証今時以作善降祥作惡降殃之言相爲勸勉故至今談善教者以先生爲巨擘焉

梁德彰性豪俠爲人排解嘗以墾地數十畝分鄰村邑中諸弊累民者輒籲長官永

行禁革民今賴之來賓有販牛被劫者妄指攀平民官遽捕十餘人已誣服矣德彰爲申雪且計擒真盜數人羣冤頓釋象州覃梁二姓相讐殺梁誣覃罪幾族德彰願以身家保官廉得實事遂寢全活甚衆後贈武德郎

陳先謀字仲貽至性過人居父母喪水漿不入口累日總家政內外無間言爲鄉鄰決曲直一言不復爭右江道戴錦素重其爲人先睿字臨以康熙間歲貢母張氏病痿痺扶持抑搔三閱月兄弟九人殊友愛自號怡園任遷江教諭春廩貢爲人方正里中以嚴見憚族有行不義者雖年老子弟必召責之任上思州訓導以終養告歸張瑚字禹華貢生性友愛兄弟五人皆早世撫養孤姪九人婚姻飲食率皆身任又建學延師以課之子姓中鄉舉歲貢爲諸生者不乏人鄉里榮之卒年七十七

張任清字秋濤乾隆間歲貢學行高潔精研理窟著有四書講義藏於家任忠字臣齋亦歲貢品行端潔不履城市好施與有稱貸者度不能償還以券丙申丁酉歲荒餓殍載道傾囊掩瘞任永淳訓導以立品訓諸生有請託輒拒弗納罷歸士民祖餞

載道卒於家年七十三

黃充字錫書乾隆甲午舉人文行純篤不喜紛華常主講席爲士林模範

黎光燦乾隆間歲貢性剛直善爲人排解有不直者以理斥之鄉里疑難事必質問而行家中不中貲然好施救濟人至今稱之

將夢驥字子俊姿質穎異少力學登嘉慶丁丑進士授貴州綏陽知事升古州同知護理貴東兵備道歷充戊寅各科鄉試同考官所履皆有循聲在綏久惠政最多士人設位祀之年七十告歸日課子孫足不登長吏之庭及卒鄉人咸哀慕之炳辰字西垣弱冠應試卽冠其曹爲諸生有聲黌序道光癸卯數上春官不第改教職選懷集教諭嘗著戒溺女文拯嬰彙編及各種醫書存於家

黎覲光字笏山監生慷慨有瞻畧道光間洪軍起義金田村縣城被圍危在呼吸覲光督練固守以功保縣主簿加六品銜咸豐初艇賊李文茂等犯縣城覲光偕其弟廩生瑞森晝夜巡守賊不得逞丙辰春賊復大至力竭城陷瑞森巷戰死覲光奪門

走馬步橋之八仙寨調集鄉團爲復城計時貴縣城黃鼎鳳方擾邑邊境前後受敵
觀光率村民閉關自固卒獲安堵事平始出辦善後督子姓輩勦土匪黃四楊長壽
黃老受等邑境肅清復提倡捐資設城南義渡鄉人德之卒年八十歲

李元襄字佐材道光間歲貢爲人清白自持咸豐初會勦土寇元襄指困助饟晚年
任全州訓導新進諸生有不能備修脯者欣然教之壽八十二歲無疾終至今子孫
昌熾人以爲積善之報子庠生煥林歲貢慶林郡庠福林俱克紹前烈

劉季三字梅士道光己酉武舉性忠勇陳阿貴之亂季三與兄孟三集團滅之巡撫
周天爵聞其勇召使從軍與洪秀全鏖戰於邑之台村天爵登高望之見季三衝鋒
陷陣嘉其能補平樂千總以破雙髻卡功得賞花翎調守桂林補潯州都司隨勦金
陵大戰紅綾橋遷賓州參將補羅定協副將加直勇巴圖魯勇號積功擢直隸通永
鎮總兵時長濠失利諸軍退守宜興季三招集散勇民團挫前鋒軍威復振後俘囚
稱姓劉一名將其軍弱而復振者卽季三也會浙江告急奉清諭以提督記名總統

水陸諸軍赴援尋解省圍連克餘杭等三縣移營富陽突敵蜂擁而至彼衆我寡連
日鏖戰陣亡部將張順劉桂芳二人季三衝鋒陷陣戰益力被砲傷左乳洞胸卒於
軍臨危猶大呼殺者三奏聞清廷嘉其忠烈賜祭葬予謚剛毅祀昭忠

王作新附生道光戊申洪秀全馮雲山匿桂平紫荆山開拜上帝會毀壇廟神像以
神其說作新率鄉民擒之秀全脫去獲雲山械送大湟江巡檢黃基赴控府縣首發
其事知府顧元凱知縣王烈驗其書以爲類勸善也乃駁作新呈詞甚厲謂輒以大
逆陷害人皆斥不納作新又言秀全雲山在象州亦毀壇廟且購捕有案請會緝亦
弗問其黨曾玉珩斂炭徒錢爲營脫僅逮雲山回籍雲山至半途逃回金田遂與秀
全韋昌輝楊秀清蕭朝貴石達開等起兵咸豐辛亥三月巡撫周天爵據控查參元
凱烈基等革職拿問作新名至上聞事始得直其後咸豐壬子六月初六日賊由武
宣回竄新墟作新集團助勦其子季元姪伯元仲元與武生羅思楊思□童生羅浩
羅啟生等皆陣亡光緒丙戌京師忠義彙奏作新准照積勞病故例祀忠義伯元等

恤典有差 姪敬齋名德欽居桂平之紫荆山父大作歲貢少隨省試舟觸石破登岸曝衣履父令背誦五經不少輟長遂博通其義中同治壬戌舉人當洪秀全之入紫荆也父命往諭其鄉人勿爲所惑秀全矯引五經上帝文爲辨歸語人曰時事可知矣武俗故勁悍德欽獨鎮靜不任俠教授鄉間恂恂如儒者潯江以北士多宗之陳朝宗少讀書咸豐初投筆隨征江南積功至知縣保留江蘇候補賞戴花翎己未與賊戰於江北浦口身先士卒賊大至寡不敵衆陷陣而死事間予襲雲騎尉（天馬庄人）

覃許嘉字薦芳道光間歲貢力學能文有膽畧咸豐乙卯春艇匪犯縣城許嘉督團守禦賊不得逞遂分張金德等黨撲所居北鄉許嘉以親在星夜馳援途遇賊戰於黎江口體受重傷弗少却賊亦尋退丙辰縣城陷兩學校官及宦中妻子多依之有病歿其家者殯而卹其孤著有春秋小註近古往行錄未梓 子先澄號鎮川壬午舉人亦能力學得家傳教授鄉里間門下多名士選東蘭州學正避陸亞發之亂於

崗藏以大義曉諭猺人咸感激死守請兵克復州城事平掌教蘭陽書院士氣復振俸滿截取運庫大使改指廣東署理東界場鹽大使作吏之中不廢講學民國成立後還鄉選舉縣參事會員歷應龍勝昭平司法員凡代批判告示文所在傳誦採登報章現担任縣中學校國文教員生徒悅服奉其文爲模範焉

梁國標字錦軒從九品性慈和以忠信傳家數世未嘗與人訟好施與道光間邑饑餓殍載途國標發倉穀以賑不給則糶米濟之存活甚衆咸豐己未土匪倡亂鄉民逃散無所歸國標讓屋以居之授田以耕之令無失所時廖八劫象州掠子女至邑境國標贖而歸之其好喜多類此夫婦享大年重房花燭孫在鄉中丙子武舉猶及見焉

覃肇猷字允升同治壬申恩貢清苦力學屢試第一書法雋秀天性謹厚事繼母婉曲承順訓子弟循循有序生平守正不阿爲鄉閭矜式

黃若桂字辛甫性嚴毅訓子弟有法度家庭肅然生平好善足跡不到公庭以長厚

稱年八十一無病而終 子山輝山甸同年入泮甸號子屏由廩膳登癸酉舉人秉性恭慎純篤不慕榮名惟寢饋經史教授生徒以敦品爲先終日危坐無少欠伸武貴間名士多出其門老年猶康健與兄時叙天倫之樂倡建宣講亭於東挽墟每逢朔望日期親率生徒宣講聖諭善書申明大義聽者如堵風俗爲之改純壽八十六歲卒之前三日將所置書籍徧曝收拾韞藏無疾而終

陳巽申原名大璨字蘊菴品格清高工詩古文詞時與中表黎卓仁相功劇謁選京師十餘年與詞館諸公唱和無虛日出爲江甯通判罷歸構亦園書屋築聽濤亭於鹿園松樹下日偕二三故舊咏吟自適長鬚垂領下德容鄉人見而敬之年八十七建培字蘭階廩生啟煥子兄建墉嘉慶庚午舉人建培學行高潔雅慕陳仲弓爲人有豪族陷於事賂重金求緩頰拂袖去乞爲詞訴之官亦斥不顧由是鄉里重之造謁者不敢及他事屢躡場屋遂淡於進取授徒爲業遠方多就學焉不能卒業者必玉成之不受修脯且分膏火以供其乏一時知名士多出其門

陳勝修附生家僅中貲而慷慨好義自設長壽義渡濟行人修文廟建新路橋皆獨力任之咸豐間兵荒薦至避寇就食者二十餘家勝修空倉以濟有執券告糶者度不能償返其券鄉人德之

張昭然字子明廩貢生家貧篤學與中表陳超然肄業邑之水月菴日樵於山夜則篝燈相對讀手不釋卷二人同時爲廩生教授里中生徒孜孜不倦胸無纖塵里人高之

胡祥宸字鹿峯附貢生性中和而介勇於任事以團防功保教職加 翎六品銜歷署容縣武緣羅城訓導同治間有土豪占附生陳怡士田諭以理不退怡士願輸之公祥宸慨然請縣官懲治之盡返所占田入其租以貲邑諸生省試一時稱快
陳步高字凌漢通詩好吟咏咸豐間由武生投軍隨總兵劉季三轉戰浙江所至克捷積功授浙江嚴州協副將罷歸光緒己卯署潯州協李陽才既受替鬱鬱不得志竄擾越南步高從征出關積勞病故大吏請卹如例蔭子廩生衍慶以訓導用

刁經裕字通甫勇而好義咸豐初洪軍蔓延大江南北經裕從征各行省迭著戰功遞保花翎遊擊加副將銜補桂林遊擊前署鬱林都司有匪夜襲州城經裕懸女牆佯爲禦狀匪他竄聞道要之斬殺無算年滿赴桂林營建義學四置產以贍師徒有直隸李椿年者宦於粵故人也夫妻物故遺三孤皆幼穉經裕提携養育之爲措資權子母閱數月歲乃以所入送而歸之

羅敏德其父贊士力田一日虎攫贊士以去敏德挺而捕虎曳其尾大聲疾呼衆見其與虎鬪皆奔集以農器擊之虎斃贊士得無恙

覃老德年十二父老甲偕德守稻田甲忽爲虎攫去德寤奮起逐虎曳父足與虎支撐久之虎捨甲蹲田中若將再噬狀甲絕而甦語老德曰死矣汝亟去老德以甲垂斃弗忍離驅虎遠去乃奔報家舁甲而歸

廖大翼監生慷慨剛正清道光中與古武二里紳民爲首募貲創建祿鴻橋後自出貲開闢古煉隘山麓路十里又自出貲修廣山路由縣界義良村背至桂平界之寺

村咸豐甲寅四年夏大飢與里中劉黃殷實家約平糶不許翔貴以便貧人自發所儲穀以贍宗族閭里德之道光二十九年桂平賊覃亞兒率匪黨三百餘人擄花馬覃志剛經本村又搶劫連夜集團與敵大敗之賊死傷共七十二人三十年陳亞貴率匪黨由灣龍下擾武平敗竄龍山復集團與戰大敗之追至牛脚口賊死傷無算生擒七人解武宣縣正法咸豐癸丑三年貴縣女賊與匪目黃亞左亞右率匪黨千餘人由武賴上入古煉隘下武平滋擾爲團練敗竄龍山又大集貴 武附近團與戰八日賊大敗越山散竄去廣西巡撫周天爵以屢次出力敗賊賞給六品軍功至咸豐庚申秋貴縣石龍匪首李花四率匪黨數千打破中灣圍攻古煉六十餘日之久與古尖周作聖集桂貴武交界龍山團練與禦守古煉村獲以保全壽八十三子佩玉邑增生醇謹篤實咸豐辛亥十一年二月間貴縣匪黃 鳳黨龔繡六率匪黨五千餘人由貴縣北山里出擾武平石龍團練擊敗退竄龍山又起團大敗之於古尖賊死傷無算生擒一匪解石龍正法地方由是安堵壽六十三孫績凝字誠

之恩貢生咨部以直隸州州判銓用壽年六十一孫績熙字子顯歲貢生鄉試連荐卷六科戊子備中門下多名士光緒戊申赴京驗放分發廣東府經歷候補三年知清政紊亂請假歸梓里添營文山別墅松竹山房閱古今書不慕榮名民國二年與編輯縣志時年六十二曾孫超箸性恬毅尙任俠丙午游日本肄業東斌學校組織同盟會被舉回國運動革命并被舉創辦地方自治局民國成立稽勳局爲之列傳紀功

覃天佑監生果敢不畏疆禦清咸豐間北敢村土匪黃進四糾貴縣黃鼎鳳匪黨蹂躪鄉里時匪攻破村庄幾乎全沒尙剩住屋一座與堂弟監生天保勇而有畧臨敵不懼二人奮擊大敗之復回全村同治初年與覃遇春鳴之府縣官知縣劉汝棠率兵勦北敢村陣亡知府王達材統潯州協覺羅達三參將黃才貴營兵困征之殄厥巨魁平其巢穴地方賴以綏靖子世揚少聰穎童年列膠庠弱冠食廩餼習舉業數奇不遇遵海防例歷署武緣遷江訓導蒼梧教諭所至勵諸生以敦品立節爲先解

組歸後光緒間土匪韋老恩等滋擾鄰境隨同知府夏敬頤督辦善後賞給超委然淡於仕進爲鄉里解紛排難一秉大公旋值全省議開辦鐵路被舉代表下羊城知海禁大開學術宜中西兼習迺命長子邑庠生國書渡東洋留學次子國選赴羊城習優級師範二子畢業歸先後掌闔邑高等小學及中學教習國書以民國二年稟見陸都督委督催換契員時正壯年也

武振貞號之幹歲貢北鄉人歲貢宏治之孫性聰敏少年鄉薦不售旋遭世亂咸豐初父庠生德孚被賊李鬼七拉身戕於舟中貞抱父讐四十餘年部選義甯縣訓導貞不之任曰父讐不報何以官爲使子姪輩踪李賊於黃茅墟殺之遂與弟庠生振亨子庠生華國姪庠生炳國俱投案訴府省數年在押仍不廢學日講倫常大義應潯陽書院課藝正氣流於楮墨之間屢取第一事得雪後文催上任仍不赴日以課訓子孫爲事其子庠生觀國敬國其孫庠生維猷述猷皆其親教者也卒年七十有八妻黎氏年八十有七富貴偕老一鄉敬慕焉

韋敬端號小莊古豪地西村人歲貢性嚴重純潔勤學不怠文以清真雅正爲宗詩尤結構雄壯逼近晚唐如題越王臺懷古萬家烟火餘王氣半壁山河仗霸才之句可見其概當光緒朝己卯黃老壽乙未韋老恩癸卯覃老泰等土匪擾亂地方疊經軍官蔡經章知潯州府夏敬頤統領曾紀壽等督兵勦辦均奉諭襄辦善後無枉無縱地方賴以除暴安良人民稱道弗衰就職廣東縣丞以簡介不得志講學羊城一病而終同鄉震悼賻殮如禮歸鄉之日臨江弔輓者如市其壻拔貢龍祖瑜時亦以州判分發廣東自病歿至殯殮盤桓回梓無不躬親集其臨終詩十首刻發親友跡其生平自爲諸生以及遊宦皆在青氈中其門下士甚多本鄉有覃炳崧黃祖瑜廣東有梁沛霖等皆其親炙生徒也子六人長昌齡讀書循禮有父風

黃檢真號榕三西鄉波貫人由附生保舉知州性孝友以親老不肯就居鄉辦團最爲出力禦賊最有機權賊之踞眉山村也夜聞黃九思至遂宵遁九思其別號也賊之攻巖石也縣官在內檢設伏敗之殺賊數百父沒服闋後始改就教署永康州學

正釋仕歸與其弟校真相及愛老而彌篤尤尊師重道延其師覃許嘉訓子銑之成名食餼師沒己雖老親泣奠執心喪勸其孤先澄力學登賢書其急親朋之患難也雖挺身傾囊而不吝見橫逆凌人者亦必面責而訓戒之事無不息其待人不假詞色不修禮貌人鮮見其一笑者望之幾如夏日之可畏此亦可見其剛正之一端矣

子銑之早逝以姪鏞之嗣亦能繼家聲官廣東揭陽縣巡檢現致仕家居

覃貴福號壽堂東鄉那沙村人性誠懿有神勇年十二應募入洪軍年十七南京開試應武科時數萬人不能以武藝定高下洪皇命能舉應天門外石獅者爲第一石獅歷朝舊物也不能秤其輕重人無有能舉者貴福挾而抽之離地寸許洪皇大喜親署爲狀元曾統萬人後洪敗福歸清雖鬱鬱不得志加以副將亦無求大用其征鬱林時獲全勝得槍四百餘枝不自解而以讓別將亦不爲子姪私收一枝可見其有古名將不貪之風矣歸鄉年六十四猶能以兩指夾五十雙毫任後生有力者不能拔足見其神力云卒年六十六

覃松華字鳳書南鄉松嶺村人精明渾厚積自性成家不中貲曾充書吏內而長官外而戚友莫不信服及我武興學校衆舉爲庶務收支今且七八年不惟事皆就理人無間言而校中偶有支應困難之處向各殷實挹注無不立應蓋其所取信於人者有素也

趙之楨號桂山西鄉石耆人歲貢性敦厚富而不驕好讀書自少至老手不釋卷家事付之長兄之珍惟與弟之元相爲師友日討論經史弟登辛酉拔貢選懷集教諭隨登癸酉賢書不復求仕楨晚年部授全州學正致仕時年已八十猶眼觀細字書談詩文醴醴有味子貢生德昌財政員德祥姪庠生德麟姪孫庠生繼光皆得其家學身壽八十六有六妻 氏壽七十有八歷重遊泮水重完花燭之喜可謂人生大福也

王毓元號長善廩生在廂平畚人性聰穎舉筆成文趙之楨武振貞覃許嘉等與之爲友事之如兄鄉薦不售旋遭亂鬱鬱抱病而終年四十餘歲其所作戒洋烟文考

棚序士林至今傳之

郭元鼎字荆山古豪下里雅岡村人讀書識大體仗義疏財八股不甚求工但好作古文會咸豐年間洪楊起義金田翼王石達開囑幕僚作討滿檄文無當意者間公名專使走請屬稿公慨然爲作一檄發揮民族主義暢快淋漓達開大悅以厚幣報之不受聘充幕賓以病辭時地方匪徒藉名滋擾鼎乃自備餉械集鄉子弟爲守禦天坪山匪首黃鼎鳳屢越境侵掠鼎迭會鄉人創之楊長壽據盤古黃四據北敢擄掠鄉村劉梁兩縣令督兵會團勦撫鼎每役均躬親焉承父建韶家殷實樂善好施凡地方義舉無不慨慷捐貲荒年屢以谷米散給平民鄉人避賊就食者傍屋而居當道重之有子九人孫十九人其第五子尙堅字聯湘光緒壬辰歲貢稟性戇直善爲人排難解紛第六子尙貞字幹成宣統己酉科恩貢生平見義必爲光緒庚子年會匪圍攻石狗村貞自備餉械親率鄉人子弟擊散是年冬縣令呂德鰲被匪首馬威南林四等擄於良村聲言乘機攻城貞聞報迅帶練赴城守禦民國元年光復軍

興四方綠林乘機聚衆攻城貞又親率鄉人子弟赴救由是匪黨聞名畏避清末風氣初開竭力興學曾勸捐襄建潯陽中學校並會邑中士紳開辦合邑學務公所建設合邑兩等小學校桐嶺區高等小學校歷任縣參事會員合邑自治研究所所長迭次保獎由直隸州分州加五品翎頂第八孫椿森字松年宣統己酉科拔貢讀書不專務帖括詞章留心於古今治亂民族盛衰壬寅年在師範講習社肄業歸演說興學之利將賓興書院公項撥充學費聘教習招學生分科教授兼任校長一年而成績昭著乙巳遊學日本法政大學畢業丁未歸國任本省法政講習所教習歷充調查局自治局科員兼全省自治研究教習省諮議局書記長辛亥年以直隸州州判分發雲南委充法政學堂教務長會武漢起義聯絡軍界光復雲南蔡都督與約回桂聯絡陸都督榮廷宣布獨立會師北伐未行而桂省反正之電至因四川總督趙爾豐尙據成都以抗民軍蔡都督出師援蜀遂以昭通知府兼營務處糧台督辦諸職見委方擬束裝赴任忽接桂省電說黨人分攻柳潯各屬椿恐桑梓破壞繳印

辭回至梧州遇陸都督委赴東省見陳都督炯明疏通意見約定互相援助返桂後委充秘書副長組織臨時省議會邑人舉充議員未就會中央臨時參議員缺額陸都督派委補充辭不赴院各省都督派委代表赴京會議政務廣西都督派三人椿與焉至京條議本省財政軍政民政並提議中央應早規定大政方針及統一整頓財政諸辦法二年民國第一次國會成立被省議會選充參議院議員第十四孫柏森字友松陸軍小學速成均畢業

周作翰清監生武下里人和村人慨慷好義有膽畧道咸間土匪蜂起向殷戶打單需索翰拒之匪遂糾黨千餘人攻村翰與兄聰督練固守拒戰數晝夜賊敗遁全村賴安盤古中灣被匪佔踞知縣劉汝棠督兵拯救翰率練助軍攻匪克復之旋以屢擒要匪得獎五品軍功以正直孚鄉望排難解紛人多悅服禁賭尙嚴厲爲鄉里敬畏子思泉邑廩生性剛直有父風地方自治學務多賴維持丙午年創辦本區學校未有校舍辛亥年創建校舍於桐嶺墟振風寺舊址被舉任本區學校管理連三年

民國元年被舉爲縣署財政課員又被舉爲參事會員曾辦縣中學女學等校復任縣農會副會長暨禁烟分會事宜均稱厥職孫恩霈恩耀俱中學畢業霈被舉爲本區自治議員復任本區高等小學教員連三年

巫發麟號玉書三里人生平樂善好施丙申歲旱罄倉谷以賑族友且施藥施棺年費不貲而尤熱心地方公益社會教育子紹咸號雲山邑廩生上海中國公學師範畢業歸担任本墟半夜學校義務教員及商業自治研究會會長歷充縣立高等小學校校長及東鄉鎮立兩等小學校校長七年於茲民國二年十二月二十二日奉廣西都督兼民政長陸指令該校長留心辦學慎重其事殊堪嘉尙等語戊申年遵部令著有小學校用鄉土地理教科書

羅國揚西鄉人性誠實畧通詩書有遠識當咸豐時謂世亂而治必賴讀書築精舍聘宿儒以教鄉中子弟雖重費脩金不吝壽年八十七歲厥配李氏亦享壽七十八歲子文典讀書深明大義丙辰城破後聯團奉官居巖口以安鄉里喪亂旣平長孫

傑元遂入武學次孫調元歲貢生性尤聰敏讀書皆有實用長於言語歷署義甯臨桂永福上林武緣教諭全州學正思恩府教授所至長官皆稱之曰能民國成立條陳其才可用教缺旣裁因令署理思恩府司刑勞績告病尙給俸回家調養其孫宗海由本省體用學堂優等申送學院考取入學第一今其元孫等多入學校肄業人以爲有詩禮家風云

李維鋆號調元大暮村人品格清高家貧好學年二十入郡庠猶朝夕攻苦里中俊秀多依請業一時在學諸生多有出其門者子鏡蓉邑廩生

覃元吉字永貞邑庠生古佐村人孝友嗜學善事八旬祖母教子有義方熱心公益倡建石座橋以便交通道咸間流寇梁布佑陳香晚等蜂擁入境爲集團擊退鄉里賴安有司嘉其功奏保訓導實官以世亂不就卒於家弟元亨性剛直務農尚武倡興水利多處鄉里田畝資以灌潤土匪黃四勾結鄰封流寇爲地方患嘗集練攻敗之以辦匪出力獎六品軍功咸豐戊午年匪千餘攻村率族巷戰同死於匪者七命

鄉里哀之列名府志義烈表子遇春性穎悟尙氣節有父風悼叔亨爲匪戕且恨地方多匪害屢集團練攻黃四誓不兩立避居鄰村流離轉徙不輟學列邑庠捐貲助餉請官軍剿黃四滅之遂除積年巨寇未幾積勞病故年三十二孫炳崧以襁褓稱孤克力學遊日本學師範畢業回籍被舉辦理全縣學務連三年己酉由歲貢保送禮部會試分發湖南府經歷甫到省委零陵查案催欸銷差後告歸隱於家民國成立後出縣辦事被舉爲縣議長反正之初人心浮動與諸同事協力鎮靖身先完糧以爲鄉里倡二月二號暴徒攻城人多聞風先避毅然住局任事協同官軍紳商運籌固守發電請兵後冒險出城調團援救保全城池事平後被舉爲省議員又被舉爲全省禁烟會評議長會凡事建議維持俱盡心力曾孫六人允純潯州中學優等畢業獎優貢允寬陸軍測繪學校肄業允懷中學肄業餘幼學

黎肇基號元卿城內人廩生性敏達活潑不拘結交多豪俊歷署臨桂訓導永福隆安興安陽朔教諭所至宏獎後進士類奮興居鄉辦團剿匪有功加五品翎頂民國武宣縣志卷十一 紀人 列傳 廿三 梧州商業日報承印

元年充省防管帶平懷遠張三嫂梁月初股匪以勞績賞一等勳章平柳府劉古香亂以異常勞績升平防督帶授陸軍步兵中校胞弟附貢鴻基於賑捐獎勵州同堂弟啓基廩貢辦團賞五品翎頂建基定基均廩生培基歲貢以警察教練畢業充縣城巡官本邑高等小學監學縣議事會副議長胞姪式金法政別科畢業省議會候補議員一門鼎盛近日士大夫家所罕有也

劉德三號子宣季三嫡堂弟也咸豐間從軍江南督帶炮隊一營與洪軍鏖戰屢建奇功尋解浙省圍由縣丞保花翎同知銜補授江蘇知縣迨季三陣亡扶柩旋里悲手足斷折不求聞達於當時適同治丙寅年捻亂粗平劉邑侯汝棠帶勇清鄉常造廬勸出佐理以本鄉人辦本鄉事煞費苦心始能安插土客叙功保獎儘先補用知州在人以爲仕路可圖而德三則每因兄陣亡不願問世嗚呼天倫敦篤無愧難弟詩云惟友孝於兄弟德三之謂歟子炳宸炳光附生孫培瑞於賑捐案保縣丞劉炳禮號子宜監生東鄉勵勉村人少貧篤學見重於鄉其最足載人口碑者憫交

易之不便清同治庚午年興復東鄉墟農商樂利焉光緒癸未捐巨款倡設鄉賓興士林迄今感德近年科舉廢改賓興設兩等小學校卒年七十五鄉人學生送葬者悲歌於路絡繹不絕其子培璜郡庠生培瑄培球增生能承父志子曰父沒觀其行三年無改培璜兄弟有焉噫炳禮不沒矣

劉濟和號子中東鄉新安村人早歲失恃兄弟九人各爨家貧天性純篤前清道光二十九年會匪蠢動悲父被誣繫獄赴公庭請以身代隨得昭雪三十年與兄季三勦滅匪首陳阿貴咸豐元年洪軍起義奉劉邑侯諭守雙髻卡旋守城迭與洪軍鏖戰於台村七月復隨兄季三破於雙髻卡繼而洪軍趨永安偪桂林爲省垣守禦洪軍北去沿途追戰直至金陵叙功給五品藍翎保獎千總時年及壯尙無嗣遵兄命歸家所得贏餘凡諸姪幼孤者教養婚嫁皆身任之壯年後連育二子人以爲孝友之報長子炳熙號緝臣清附貢善事二老母外則見義勇爲光緒九年在鄉辦團創立賓興團局二十餘年不受公薪屢獲劉猪郎六吳洪金等著名匪首親詣領二匪

賞於夏府岑督悉數賞練丁給失主購槍碼存局保衛地方二十九年米價騰貴籌款賑荒鄉族保全甚衆三十一年後科舉廢學校興奉府諭籌建潯郡中學經費改里賓興爲兩等小學督修縣高等小學校兼任校長附設師範班謀教育之普及時適匪首楊三陳狂六等聚黨滋擾請陳縣令鴻謨抵府具領槍碼分給各區防守縣境粗安宣統初任自治籌辦所長辦理要務而且借款平糶以繫衆心獨立後人心浮動屠捐不繳錢糧不完縣參會及佐治等員欸項奇拙獨力撐持借貸濟急隨集自治團體開會身先完納以勸導各區錢糧始樂輸將屠捐亦漸行繳納衙署會所稍藉維持未幾外匪披猖土匪內引蠶聚攻城人心惶惶每多逃避身與軍練官紳商民登陴固守歷三四晝夜使孤城危而復安兩年來辦理縣議長會務及省衆等議員選舉諸要政並創立縣中學女學等校任縣農會長暨禁烟分會事宜充修縣志編輯員總計公垂三十載至專據情理爲地方排解稍暇吟詠自娛闔邑人士多悅慕之次子炳麟於賑捐案獎縣丞孫八人長培璋附生廣西簡易師範畢業次培

瓊監生梧州自治研究所畢業三培瑗本鄉兩等小學優等畢業獎增生曾孫八長德成潯州警察教練所畢業次德光縣中學校肄業
陳禹鈞號松臣上任村人貢生生平謹厚足迹不履公庭鄉黨以長厚稱焉
廖盛泰明洪武庚戌三年奉委征平東南海賊陳童柳而綱平縣安甯又平馬流賊於山深叻斗間封清益將軍由福建莆田遷居武宣孫廖政明成化元年左僉都御史韓雍十一月由桂林分左右軍來潯十二月生擒侯大狗平大藤峽改周冲巡檢於勒馬灘以政爲副巡檢玄孫奏寄明正德丁卯二年與陳明威擒賊首胡扶記解省奉勅授都司

廖午養是廖六乃盛泰裔孫明萬歷十五年封威武將軍其子文登奉勅授都督總兵經當地方在勒馬押住奉職防護水陸大路週年候送萬歷壬寅三十年加勅軍民之職崇禎末年清順治入關覆明宗社降其職父子霸踞地方欲恢復明室又爲韋應金黃錢除黎氏要路截搶謀占地方之患乃有萋斐貝錦羅織其罪潛稟於清

當道以爲叛亂康熙四年擁清兵征之然叛於清者忠於明故天厚其報子孫蕃衍徧及潯桂南太間也今際民國時代當表出之

陳文潔號蓮初家貧好學性純孝幼時有族人陳汝爲喜其勤敏每授徒必攜以往夜間無燈佐讀則以書就之友人潔不以貧而廢學年十九入邑庠翌年食廩膳家無宿糧母有難色乃託族人安母後遠遊滇南就募十載寄貲養母得以無恙其母現年八十七

張鳳翔字凌雲通挽區大樟人忠勇好義當前清洪楊起義寇草蹂躪地方翔以保地方自任聯團迭擒匪首邱二娘劉八馮三黃亞石梁亞昭關九等由例貢獎勵藍翎州同銜餘匪梁培友等皆畏避之通挽區賴以安鄰境暫因肅靖咸豐五年匪風復熾被匪仇害有子五人第五子麟史繼父志光緒晚年土匪拜會行劫曾出首聯團保衛地方得獎五品軍功辦團二十年不辭艱苦尤善排難解紛鄉里心服之孫天照現充本區自治議員天懷上海中國公學師範畢業曾充縣高等小學教員又

充本鄉兩等小學教員及縣教育課員天還師範畢業天旭警察畢業
覃憲典附生大林古寨人性和平幼學時其兄嚴加夏楚並無怨怒平素友於兄弟
式相好無相尤

劉炳宇字統成東鄉人清武生有胆畧少好獵善讀兵書因武科廢清光緒壬寅從
軍偵知平南匪首張老鷄三糾集大股破湟江宣墟勢將越武圖柳字報縣奉諭招
鄉兵守雙髻卡賊不得越竄入鵬化宇率兵破其根據地遂擒之此宇立功之始也
癸卯肇慶人蘇泗隆糾黨嘯集王田潯守彭親行征勦宇率練爲前鋒破匪巢殲其
渠魁甲辰年五月首匪陸亞發投誠復叛陷柳州來賓首匪陳士升應之宇奉彭守
募勇編爲捷字營充當幫帶追勦數月陳匪卒餘匪敗乙巳年率隊勦黃鉗匪破之
匪首郭三（桂平人）逃柳爲濟軍獲丙午年勦定羅土匪農致祥誅之而該地方肅
清戊申暨宣統己酉率先鋒隊赴潯勦冷田大井等處股匪獲首匪楊三擊斃陳狂
六各匪受創匪夥大王八李濟才等皆就撫庚戌年奉調率隊赴中路爲懷賀富一

帶游擊之師斃匪夥謝鷄六李七三等多名隨殲首匪陳大肚六等於羊頭嚴擊走
連山匪首山皇帝於讜山是年九月西省反正政府委充分統劉炳權劉達慶陳
鴻慶韋肇隆劉運文沈鴻英等各管帶維持地方秩序十月署柳州府長兼支應局
統稅局民國元年交卸隨奉都督委充幫統國民軍第五軍凡五隊二月五日匪攻
武宣城督隊解圍二年八月奉 大總統任命爲廣西陸軍第一師第二旅第三
團團長九月第五軍第一隊劉純甫劉麻六等煽惑各兵乘機生變宣佈獨立脅取
統稅銀餉宇時扎石龍大灣聞變提兵回柳會同沈鴻英及黃肇熙護商勇黎肇基
帶省防兵內外挾擊亂黨盡散擒其戎首劉古香等正法事平 大總統授陸軍
步兵上校加少將銜統領第八軍移駐武宣十二月匪首黃三復糾柳州亂黨曾社
宋宋五韋文易葉煥新及修仁永安桂平平南等處獠匪嘯聚象縣屬之太平獠宇
遣兵圍捕之匪逃至木屨村爲官軍撲滅此宇之累立戰功也現年四十五歲允爲
民國長城衆望咸屬之云

翁盛伯李勉洞心人白手成家性誠實樂施濟舉鄉飲介賓長子月麟入學時公年六十一晚子瑞麟入學時公年八十一邑人稱觴上壽貢生張夢瀚撰詩頌盛云生平未肯逐名場犁雨鋤雲課夕陽溫叟不爭尤不奪霍王無短故無長睦媪任卹人叨惠富壽康寧天降祥髻嶺巋然耆宿在春秋迭進八千觴時道光三十年也次年紅巾事起以忠孝訓其長子月麟辦團守雙髻卡盡心竭力不避艱險紅巾黨偷越髻嶺致腹背受敵卽飛報劉縣主作肅曰卡失矣請速回守城縣主稱其忠君愛國心嘗對人云翁月麟有國士風贈聯云滄海六鰲瞻氣象晴天一鶴見精神當時眷屬避居外鄉數月而還門廬無恙越次日公卒鄉人稱公福焉後孫西昌西貴西岐西魁曾孫傑光倬光皆在庠誠積德裕後矣

朱達華號紫亭馬到村人生平樂善好施凡辦理團務及造橋修路一切公益事無不見義勇爲前後數十年始因兵燹迭經捍衛備至繼則奉公潔己遠邇咸欽至爲人排難解紛莫不悅服間有執拗勢成構訟者則解囊與人息事善行不可枚舉故人

及身以監生保巡政廳姪耀勳增生耀熙廩生孫濟霖廷槐遊庠人咸謂修德報云刁經明號用亭性勇敢十歲失怙紅巾變作徒戎踰嶺轉戰湘鄂皖江淮奏捷入覲命操滿漢官軍賞換花翎畢什固巴圖魯封贈三代一品同治五年任平樂協副將黔苗竄粵統軍草頭坪功成記名遇缺題奏提督調廣東肇慶協副將光緒七年權高州瓊州總兵十八年以母老乞養調潯州協副將隨丁母憂服闋入覲仍發廣東權三江協副將帶西江上下游水軍三十二年統韶安水軍終於營次壽八十四總督奏卹葬費生平善書龍虎大字垂老筆力猶健湘粵人多寶焉妻謝氏封夫人壽八十二

周廣康由廣東南海經商武宣城內性公正好善樂施修北街路及龍山橋皆費數百金命子擇師必求宿學所設泰記店公平市易童叟無欺年八十猶矍鑠聲如金石壽八十無疾而終子歲貢維熺字耀南正直有父風舉人維宗字述之性敏而好學補廩後赴廣雅書院肄業總督張之洞賞識之隨登甲午賢書就教選富川縣教

諭以母喪不到任而求學不已率子庠生鈞光幼學炯光姪庠生樞光出遊日本法政學堂畢業歸担任本縣學堂教員潯州中學校校長被選諮議局議員截取知縣分發廣東民國成立還鄉時人心不靖引賊攻城三晝四夜宗提倡捐貲助餉聯絡軍隊死守城獲安全事平後奉委昭平知事在任政聲卓著士民三請留任宗辭政府酌留半載以慰民望云

陳大燦字映斗大理字映南胞兄弟也自幼無父母友愛性成稍長大燦以太學生就職江蘇通判大理以附學生治理家事至兄宦遊歸兄弟年已五十子孫日衆乃請族親拆居分定後兄將所得之業之半讓弟而曰吾出仕未若弟治理家事之勞也弟應占產業稍多弟不特未受且曰兄風塵數十年艱苦備嘗弟有愧兄多矣亦將已占之當舖送兄互相推讓至今里中拆產者傳爲美談兄弟年七十餘雖拆居非病痛兄弟非同席莫食

陳宗福字斂五邑增生仗義疎財性純孝當咸豐世賊鋒四起鄉人無告而求救者皆賑濟焉時有匪首張亞全破台村擄其父庠生勝修及其叔象祖福稟邑令莫能救乃傾資產與再從弟善安率里人尾追兩閱月經十餘戰惟善安戰沒福則保全其父與其叔歸焉其子汝爲光緒甲申歲貢

覃發材發松北上里古卜村人兄弟相友愛出於天性家計殷實道咸間爲仇家陷害捏於官謂其入上帝會隸捕解省中途兄謂弟曰兄弟俱死則無後矣家有藏金請以脫弟弟曰兄有見識不如脫兄事或可雪弟願就刑死亦無怨解役義之爲之脫其兄止解弟到省兄歸以金償役役得金亦爲之謀請正紳到省爲弟申請俱得免禍後兄弟俱壽逾八十其妻娣姒亦偕老其子炳瑗入武學人以爲篤慶之報云劉德漢字紹宗世居東鄉蓮塘村前清記名提督剛毅公曾孫世襲騎都尉兼一雲騎尉改授縣丞試用光緒三十三年桂平首匪楊三郭三陳狂六等亂起投軍効力歷充潯防先鋒隊右江巡防第二隊幫帶因勦捕得力潯州肅清案奏保補缺後以知縣用宣統二年調充廣西中巡防游擊隊幫帶三年升中路巡防第七隊管帶于

湘粵桂三省會勦忠黨山攻破匪巢勞績異常彙保免補縣丞以知縣用旋即卸差回籍適武漢起義土匪乘機擾亂圍困縣城聞報督率鄉練馳援民國元年充廣西第六軍第十隊管帶二年改充第三軍第四隊管帶奉廣西都督陸賞二等二級金質紀勳

梁德齡字夢九洛喬人清縣丞幼讀詩書長承庭訓睦宗族則雍肅可風處鄉鄰則和平足式當安中法交戰慷慨從戎迨乙酉和議告成銷兵旋里自謂安南以無團體而亡吾人當以爲鑑故辦團二十餘年凡排難解紛捍災禦患事必躬親初無此疆彼界之分亦無假公濟私之弊前此地方安靖梁君之力居多焉

劉培祿字晉臣東鄉長安人壯年抱澄清志前清光緒朝由俊秀報捐分發雲南補用知縣迭奉札解餉及會勘文山鐵路事復充文山簸朶鐵路局委員差滿南防王統領調往差遣宣統元年閏二月初四奉公晉省途經阿迷州阻阻尾地方主僕三人被匪戕害飛報阿迷州通稟王統領各大憲獲匪懲辦後雲貴總督沈秉堃奏准

照陣亡例給卹贈知府銜蔭子德鎔以州判註冊候銓國史館纂入忠義傳

黃煥章字斐然清監生洪楊之亂維持地方保獎八品軍功世居南鄉復旦村正直可風有子六人皆年逾六十同聚一堂友恭式好長子斗燐清監生現年八十一猶康健千總斗中其四子也性勤儉訓子有方中長子祖瑜由拔貢生就職廣東直隸州州判歷任廣州府署文案高雷陽道邊防軍文案兼哨官民國元年回籍奉委羅城查案又委署龍勝縣知事政聲卓著卸事後任潯州水上警察廳科長生平智勇兼長所任稱職次子祖瓊嶺南法政學校肄業俱稱一鄉之秀

陳夢昌字榮先台村巽申公後裔以少孤克自立力學聰穎有大志居家孝友涉世熱心公益清光緒間由附生游日本學警察畢業回籍鼓吹民權謀興教育歷任武宣高等小學校教員勸學所總董兼籌辦諮議局司選員潯州中學校監學兼教員倡立家族學校年助以租地方學務多賴維持民國元年署陸川縣知事地瘠勾結粵匪潛滋內亂電請上峯聯絡粵軍勦靖之行政司法一秉大公豪強畏服人不敢

干以私嗣以積勞致病辭職適值國會解散遂不預時政專心實業弟壽昌淑昌俱積學重農子承光中學校肄業姪承材中學肄業

龐賡辛字星臣性肫篤勤學善書清光緒丁酉科拔貢歷任廣西軍門提督文案黑龍江提學使司科員民國元年回籍署懷遠縣知事時值匪氛猖獗民氣凋殘在官年餘居署不及匝月巡捕安集不遺餘力地方賴安民懷其德登報頌功曾屢辭而屢留之嗣以入都試驗卸事人民深去後之思子鵬舉中學校畢業

劉志仁字子良東鄉河馬人少貧有勇清咸豐間投軍隨叔季三戰大江南北所至皆捷積功獎花翎紅頂以副將補用歷署三里營都司潯州協調補廣東南雄協卓有政聲生平疏財仗義利物濟人卒於穗宦囊無餘貲親友爲脫驂以相助其勵臣節可謂一片冰心矣

劉日昌字克臣清武生少隨父順厚由廣東揭陽西遷於東鄉永安村白手起家老猶孺慕事母以孝聞立塾延師以訓誨兒孫捐貲建鄉賓興栽培閭里子弟長子耀

辰字少樞清歲貢生好吟咏而勇於任事籌款興學捕匪保團癸卯歲飢發倉平糶復解囊賑濟里中德其存活時有游匪蘇泗隆等占據象屬黃田隨官軍督練剿破之戊申管帶鬱防隊勦辦陸川博白等匪迭著戰功宣統己酉以歲貢驗放分發廣東縣丞辛亥委署黃梁都司巡檢見清政不綱辭職歸梓至民國元年二月二日匪徒圍攻縣城督練犯圍以入同登碑固守城危復安嗣被舉爲本區議長襄辦清鄉地方稍靖次耀奎增生獎縣丞三耀唐武生四耀文監生孫十餘人次孫月清日本東斌陸軍畢業辛亥奉廣西都督陸令帶北伐隊赴金陵充黃留守軍需科長四孫月書潯州中學畢業餘孫暨曾孫均本區兩等小學校肄業

李錦開三里人忠厚性成務農經商以勤儉正直聞奉親克孝訓子有方子懋發好善樂施有父風孫長華恬靜好學清光緒三十年由潯州師範講習所畢業回籍任合邑小學校教員爲開通武宣民智之先河三十一年游學日本因取締風潮回國入上海中國公學師範班畢業歷任武宣并東鄉公立高等小學校教員校長任縣

中學校長先後將十年循循善誘無倦色尤留意通俗教育常對衆演說改良風俗諸事宜語皆真切動聽地方資爲坊表焉

黃肇熙號晦餘二塘樟村人清附貢廣東知縣性情豁達才識靈通曾在東省警察法政肄業歷任順德巡警清鄉要差民國成立任柳州統稅局長兼支應局事並帶護商營二年九月柳州兵變徒步夜走雒容鹿寨發電請兵克復功成授陸軍步兵中校督帶游擊一二隊現任潯州水警廳長跡其歷事或先機剖決或物來順應無不綽有餘裕其才識不可限量也弟肇隆號致餘潯州師範學校畢業子鎮英號伯安龍州測繪學校畢業現管帶游擊第二隊以辦柳州善後出力授陸軍步兵少校黃運樞二塘樟村人性嚴正鄉族子弟遇之咸生敬畏咸同世亂慨長次子求學失時晚年與內弟增生黎作新計令季子册同內姪黎遇清出就外傳督責甚嚴時家中不中貲妻黎民亦能勤儉以相補助由是季子册與清俱補廩膳生樞夫婦年雖老猶矍鑠也後册出貢以親老不就職歷教生徒於家以盡孝養樞壽七十有九黎氏

壽九十有二親見孫人寬由桂林陸軍畢業升北京清河陸軍學校畢業書云有大德必得其壽此之謂歟

劉永華字子茂東鄉人遷居羅城龍岸主簿達三子武舉炳寬巡檢炳彪弟也性果敢武藝得家法少年從軍前清光緒時積功保都司宣統時帶民軍恢復羅城民國元年管帶第五軍第三隊攻破懷遠之林溪貫洞賊巢二年 奉都督兼民政長陸保陞幫統第八軍凡六隊治軍嚴而有法賞一等徽章授陸軍步兵中校

李懋材勒馬五星村人性肫篤樂善好施留意戒殺放生博覽古今善惡因果諸善書見人爲善獎勵有加見人爲惡演說陰隲文以感悟之鄉愚之受默化者良多子長勇長雲慨慷好義有父風家本寒素分居後勇以食指日繁窘於財雲乃出其積蓄聽勇合力經商甫數年遂致小康友愛日篤且熱心公益修碼頭以便行人設學校以興教育皆倡捐厚貲以貳厥事堂姪長華游學日本上海勇雲資助之力居多其任俠高風爲地方人士所欣慕勇子瀾柱由陸軍小學畢業升將校講習所雲子

毓柱中學畢業

武宣縣志卷十一

紀人
列傳

卅二

梧州商業日報承印

武宣縣志 紀人

節烈節孝傳

目錄

黎金妻徐氏 王柄妻梁氏 鍾妹仔 張子秀妻黃氏黃妣雙
黎伯耀妻張氏蒙廷召妻陳氏陳王旂妻黃氏林際時妻陳氏陳旭妻黃氏
陳王政妻曾氏陳治妻楊氏 陳舜位妻黎氏李葉妻羅氏 原昌明妻羅氏
鍾士智妻陳氏林中梅妻陳氏鍾準生妻甘氏陳大本妻梁氏梁國槐妻黎氏
覃成妻原氏 黃中妻陳氏 黎耀星妻陳氏張任汾妻林氏陳大顛妻李氏
鍾紹曾妻陳氏張任正妻楊氏陳啓暢妻黃氏張廷簡妻黃氏鍾繼祖妻陳氏
張夢鼎妻鍾氏陳綏祖妻高氏

明

節烈

黎金妻徐氏年二十金卒遺子臯在襁褓鄉人欲奪其志氏以死誓撫養幼子擇師訓讀後臯領永樂庚子鄉薦臯卒妻張氏妾王氏皆無子與姑同守苦節有司數請旌不報

王柄妻梁氏舉人梁高之女也柄卒氏年十八家貧守節紡績自給遺腹生子用賢長補縣學弟子員又卒遺幼孫肇伯長襲子千戶職氏壽七十有五有司以貞節請不報

清

鍾妹仔鍾廷秀女也年十四未嫁強暴者欲污之不從殺之事聞乾隆十四年建坊旌表

張子秀妻黃氏舉人張任宏之母年二十四秀卒遺宏甫三歲苦節訓子乾隆十七

武宣縣志卷十一

紀人 節烈 節孝 卅四

梧州商業日報承印

年建坊旌表

黃妣雙黃懇之女年十二懇義子某犯之女堅不從怒殺之乾隆十八年建坊旌表

黎伯耀妻張氏適耀三年耀卒無子守節四十餘年而終

蒙廷召妻陳氏年二十二召卒無子撫姪為嗣苦節終身

陳王旂妻黃氏年二十五旂卒撫孤守節

林際時妻陳氏年二十六時卒撫孤守節三十年而終

陳旭妻黃氏旭以雍正癸丑科捷進士授工部主事卒於官氏年二十五撫孤守節

乾隆四十二年給匾旌表

陳王政妻曾氏年二十四夫卒安貧守節乾隆十二年給匾旌表

陳治妻楊氏年二十二夫卒矢志冰霜守節不渝乾隆四十二年建坊旌表

陳舜位妻黎氏位中乾隆元年副榜尋卒氏年二十三矢志守節訓子成名乾隆四

十二年建坊旌表

李葉妻羅氏年十九夫故守節事翁克孝訓子樹嵩樹崇俱入庠生年三十九卒
原昌明妻羅氏年二十八夫故撫孤守節事姑維謹清操二十年卒

鍾士智妻陳氏年二十四夫卒遺幼子汝柏矢志堅貞義方教子柏以廩生中乾隆
丙午戊申副榜氏壽八十終

林中梅妻陳氏夫卒氏年二十六撫子允良入庠食餼尋卒無子氏偕媳共矢冰霜
卒年四十八歲

鍾準生妻甘氏庠生作霖之女也夫卒家貧子幼守節撫孤壽八十五終

庠生陳大本妻梁氏貢生大柱女年二十三歸本甫四旬本卒氏苦節自矢夫兄大
章憐其志以子啓晉繼之恩勤教育年六十九終

庠生梁國槐妻黎氏貢生光燦之女舉人卓仁之姊也槐卒氏年二十三遺腹生子
士彥家甚貧堅貞守節孝姑鞠子無怨言姑歿喪循禮子稍長嚴加約束不稍
姑息倚舅氏爲教養彥中乾隆乙卯科經魁長孫嶠亦入泮逮見曾孫四世一堂

壽六十而終

覃成妻西早氏適成一載成卒氏年十九遺腹生子尙載氏苦育成立卒年六十三
黃中妻陳氏貢生陳儒之姊夫卒氏年十九無子有欲奪其志者氏涕泣誓不改節
夫弟紹章以次子繼之守節五十餘年而終

黎耀星妻陳氏貢生宏昌之女也星卒氏年二十遺孤歲餘上有祖姑翁姑氏矢志
堅貞事奉維謹守節五十餘年卒

增生張任汾妻林氏桂平人夫卒氏年二十四無子撫伯庶子爲嗣年僅四歲教以
禮法長娶媳復卒止遺幼女旋撫姪孫承繼姑媳孀居一室有欲奪媳志者氏知
之悲泣自責媳以此益感泣矢志靡他氏守節五十年卒

陳大顥妻李氏夫卒無子氏年二十五矢志守節撫夫姪啟祝爲嗣卒年六十九
鍾紹曾妻陳氏適曾甫四月曾卒氏年十九無子矢志守節撫夫弟紹祖子爲嗣貞
操五十餘年

庠生張任正妻楊氏夫卒氏年二十無子僅一弱女以夫伯兄子承繼矢志守節有欲奪其志者力拒之守節三十餘年

陳敬暢妻黃氏庠生河鯉女暢卒氏年二十無子止一女貞操三十餘年

庠生張廷簡妻黃氏舉人黃袞之妹也簡卒氏年二十二僅一子數歲交殤矢志靡他順事翁姑姑屬繼母氏愈加敬謹曲得歡心與妯娌治家事爭先操作黽勉有無苦節四十餘年

鍾繼祖妻陳氏任來賓學司訓休次女年二十一夫卒無子夫兄憫其志以子承繼苦節三十餘年

張夢鼎妻鍾氏貢生汝桂之女夫卒氏年二十六僅遺孤子矢志守節上順舅姑下撫弱息清操三十餘年

陳綏祖妻高氏桂平人署左州學正士美之女于歸三月夫卒氏年十九哀毀絕粒不欲生以翁姑在堂衆勸中止氏內私飲泣外順翁姑翁故遺命撫夫弟依祖子

爲嗣貞操四十餘年